

# Ina revisiun incontestada

La revisiun da la lescha introductiva pertutgant AVS è acceptada

■ (anr/ac) Il titel da la revisiun legala è lung, la debatta dentant è stada curta. Il cussegl grond ha acceptà ier senza cuntravusch la revisiun da la lescha introductiva tar las leschas federalas davart l'assicuranza da vegls e survivents e davart l'assicuranza d'invaliditad. Per la deputada *Gabriela Tomaschett* (pcd Cadi) esi stà la davosa incumbensa sco presidenta da la cumissiun da sanadad e fatg socials. Ella ha preschentà ier avant il cussegl grond la revisiun da la lescha introductiva tar las leschas federalas davart l'assicuranza da vegls e survivents e davart l'assicuranza d'invaliditad. Las explicaziuns da la de-

putada sco la revisiun preschentada han chattà il consentiment da deputadas e deputads. Els han approvà la revisiun cun 108 vuschs e l'ordinaziun latiers cun 107 vuschs senza cuntravuschs. La revisiun definescha da nov las incumbensas da la regenza e da la cumissiun administrativa da las ovras socialas incaricadas dad exequir las incumbensas stipuladas per gronda part da la confederaziun. La zavrada da las incaricas sa basa sin la strategia administrativa circumscriitta cun Public Corporate Governance. Quella strategia è vegnida definada da la regenza e sancziunada dal cussegl grond avant intgins onns.